

□ العمدة □

ورد عليه الياتكى فى سخرية :
- يا عم ارم اللحمه وكل الخضار .
وقال نزيل آخر :

- يعنى الخضار اللى كويس، ما هو ميت راخر!
اشدت الزحام بشدة حول العمدة، والكل يسأله عن حقيقة الأمر.
وحكى العمدة للناس الحقيقة دون زيادة أو نقصان :

- حقيقة ربنا البقرة دى كانت عيانه من مدة، وطلبنا الدكتور
البيطرى يشوفها ما حدش سأل فينا، وبعدين اشتد عليها المرض،
وبقت كلها جروح ودمامل وهزلت وضلوعها بانت. وامبارح وقعت
على الأرض وفرقت شوية وراحت طبة ساكتة. الشاويش الطوانى
قال.. خلاص، اكفوا ع الخبر ماجور لحد بكره الصبح، حاكم
الحلزونة كان فاضل عليها ربع ساعة، ولو مالحقهاش هيضطر بيات
فى السجن. النهاردة الصبح راح بلغ البيه الوكيل ، والبيه الوكيل كلم
ناس فى المصلحة ، وبعدين جابوا الواد نصر الجزار من التأديب
سلخها وقطع رأسها وقطعها، والبيه الوكيل قال فرقوها على
المساجين «ترفيه» وخلوهم يدعوا لنا فى الأيام المفترجة دى!

وسرعان ما ظهرت بوادر انقسام داخل السجن، بعض الملتحين
طالبوا بأبلاغ النيابة، والمعلم بدوى ومعه بعض المجرمين أصحاب
التأييده هددوا بعدم دخول الزنازين حتى يحضر مسئول من
المصلحة. ولكن الجميع اتفقوا على عدم دخول الزنازين والبقاء فى
الحوش وعندما اشتد الضجيج جاء وكيل السجن إلى الحوش وتساءل
عن سر الاجتماع فى الحوش. فتصدى له المعلم بدوى وأخبره بنبا
البقرة الميتة، فلزم الوكيل الصمت وراح يتفرس فى وجوه النزلاء،
وعندما تأكد أن الصدور تغلى بالحقد، وكان هناك ما ينذر بالشر،
رسم على شفثيه ابتسامه باهته وقال :